

**FRAMKVÆMDARÁKVÖRÐUN FRAMKVÆMDASTJÓRNARINNAR
(ESB) 2015/1612****2016/EES/57/12****frá 23. september 2015****um breytingu á ákvörðun 2008/961/EB um notkun útgefenda verðbréfa í þriðju löndum á tilteknum innlendum reikningsskilastöðlum þriðju landa og alþjóðlegum reikningsskilastöðlum við gerð samstæðureikningsskila sinna***(tilkynnt með númeri C(2015) 6369) (*)*

FRAMKVÆMDASTJÖRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af tilskipun Evrópuþingsins og ráðsins 2004/109/EB frá 15. desember 2004 um samhæfingu krafna um gagnsæi í tengslum við upplýsingar um útgefendur verðbréfa sem eru skráð á skipulegan markað og um breytingu á tilskipun 2001/34/EB ⁽¹⁾, einkum þriðju undirgrein 4. mgr. 23. gr.,*og að teknu tilliti til eftirfarandi:*

- 1) Samkvæmt 23. gr. tilskipunar 2004/109/EB er hægt að veita útgefendum í þriðja landi undanþágu frá kröfunni um að gera samstæðureikningsskil samkvæmt alþjóðlegum reikningsskilastöðlum (IFRS) sem innleiddir eru í Sambandinu ef góðar reikningsskilavenjur viðkomandi þriðja lands mæla fyrir um kröfur um jafngildi. Til að meta jafngildi góðra reikningsskilavenja þessa þriðja lands við samþykka alþjóðlega reikningsskilastaðla kveður reglugerð framkvæmdastjórnarinnar (EB) nr. 1569/2007 ⁽²⁾ á um skilgreiningu jafngildis og kemur á tilhögun fyrir ákvörðun jafngildis góðra reikningsskilavenja þriðja lands.
- 2) Mikilvægt er að meta viðleitni þeirra landa sem hafa tekið skref í átt að samræmingu reikningsskilastaðla sinna við alþjóðlega reikningsskilastaðla eða innleitt þá. Því ætti að breyta reglugerð (EB) nr. 1569/2007 til að framlengja tímabil tímabundins jafngildis til 31. mars 2016.
- 3) Í ákvörðun framkvæmdastjórnarinnar 2008/961/EB ⁽³⁾ er kveðið á um að fyrir fjárhagsár sem hefjast 1. janúar 2015 eða síðar skuli útgefendum frá þriðja landi heimilað að gera árleg samstæðureikningsskil og hálfársamstæðureikningsskil í samræmi við góðar reikningsskilavenjur Indlands.
- 4) Ríkisstjórn Indlands og samtök löggiltra endurskoðenda á Indlandi skuldbundu sig opinberlega til að innleiða IFRS-staðla eigi síðar en 31. desember 2011 með það að markmiði að góðar reikningsskilavenjur Indlands væru að fullu samrýmdar alþjóðlegum reikningsskilastöðlum eigi síðar en þann dag. Þetta ferli hefur tafist. Í október 2014 lagði Evrópska verðbréfamarkaðseftirlitsstofnunin skýrslu fyrir framkvæmdastjórnina um jafngildi góðra reikningsskilavenja Indlands. Í þessari skýrslu tók Evrópska eftirlitsstofnunin á verðbréfamarkaði fram að góðar reikningsskilavenjur Indlands virðast að ýmsu leyti frábrugðnar IFRS-stöðlum sem getur skipt máli í raun.
- 5) Í mars 2014 birtu samtök löggiltra endurskoðenda á Indlandi nýjan vegvísi til að samræma góðar reikningsskilavenjur Indlands og IFRS-staðla. Hinn 2. janúar 2015 tilkynnti indverska atvinnuvegaráðuneytið um endurskoðaðan vegvísi til að framkvæma góðar reikningsskilavenjur Indlands sem verða samræmdar IFRS-stöðlum. Samkvæmt þessum vegvísi er gert ráð fyrir skyldunotkun allra skráðra félaga á góðum reikningsskilavenjum Indlands í samræmi við IFRS-staðla fyrir uppgjörstímabil sem hefjast 1. apríl 2016 eða síðar. Óvissa ríkir þó áfram um tímaáætlun vegna framkvæmdar tilkynningakerfis sem fer að IFRS-stöðlum og framfylgd IFRS-staðla.

(*) Þessi ESB-gerð birtist í Stjtið. ESB L 249, 25.9.2015, bls. 26. Hennar var getið í ákvörðun sameiginlegu EES-nefndarinnar nr. 151/2016 frá 8. júlí 2016 um breytingu á IX. viðauka (Fjármálaþjónusta) við EES-samninginn, biður birtingar.

(1) Stjtið. ESB L 390, 31.12.2004, bls. 38.

(2) Reglugerð framkvæmdastjórnarinnar (EB) nr. 1569/2007 frá 21. desember 2007 um að koma á fót aðferð til að ákvarða jafngildi reikningsskilastaðla sem útgefendur verðbréfa í þriðja landi beita samkvæmt tilskipunum Evrópuþingsins og ráðsins 2003/71/EB og 2004/109/EB (Stjtið. ESB L 340, 22.12.2007, bls. 66).

(3) Ákvörðun framkvæmdastjórnarinnar 2008/961/EB frá 12. desember 2008 um notkun útgefenda verðbréfa í þriðju löndum á tilteknum innlendum reikningsskilastöðlum þriðju landa og alþjóðlegum reikningsskilastöðlum við gerð samstæðureikningsskila sinna (Stjtið. ESB L 340, 19.12.2008, bls. 112).

- 6) Því er viðeigandi að framlengja umbreytingartímabilið til 31. mars 2016 til að gera útgefendum í þriðja landi kleift að gera árleg reikningsskil sín og hálfársreikningsskil í samræmi við góðar reikningsskilavenjur Indlands í Sambandinu. Þetta viðbótartímabil ætti að duga til að gera yfirvöldum á Indlandi kleift að ljúka samræmingu góðra reikningsskilavenja Indlands við IFRS-staðla.
- 7) Þar sem umbreytingartímabilinu sem ákvörðun 2008/961/EB veitti indverskum góðum reikningsskilavenjum jafngildi, vegna réttarvissu, lauk 31. desember 2014, ætti þessi ákvörðun að gilda frá 1. janúar 2015.
- 8) Því ætti að breyta ákvörðun 2008/961/EB til samræmis við það.
- 9) Ráðstafanirnar, sem kveðið er á um í þessari ákvörðun, eru í samræmi við álit evrópsku verðbréfanefndarinnar.

SAMÞYKKT ÁKVÖRÐUN ÞESSA:

1. gr.

Í þriðju mgr. 1. gr. ákvörðunar 2008/961/EB komi dagsetningin 1. apríl 2016 í stað 1. janúar 2015.

2. gr.

Ákvörðun þessari er beint til aðildarríkjanna.

Ákvörðun þessi gildir frá 1. janúar 2015.

Gjört í Brussel 23. september 2015.

Fyrir hönd framkvæmdastjórnarinnar,

Jonathan HILL

framkvæmdastjóri.
